

鑑

止

水

齋

集

鑑止水齋集總目

卷一

古今體詩

卷二

古今體詩

卷三

古今體詩

卷四

古今體詩

卷五

古今體詩

卷六

古今體詩

卷七

古今體詩

卷八

古今體詩

卷九

詞

卷十

書

卷十一

序跋書後

卷十二

攷

卷十三

攷說

卷十四

說記

卷十五

解

卷十六

辨原釋議雜說論

卷十七

傳

卷十八

碑墓表墓誌銘

卷十九

行狀哀辭祭文贊

卷二十

賦
駢體文

鑑止水齋集卷一

德清許宗彥

詩一

黑龍潭寺古梅下作歌

天龍聽法耽空綺歸來偃臥空山裏千年鱗甲古苔
封片片白雲吹不起幽人衝雪戴圓笠足繭嵒屹拾
危級盎然春意上冬襟習習微聞暗香裏黯淡龍祠
抗風榭拗屈疎枝壓簷亞啄花凍雀瘖無聲潭水清
空玉光瀉寂歷荒壇少人跡絕世芳姿羌獨立萬古
天南一樹留千嵐百嶂生顏色晚來霧暗山如醉瘦
影浮空點輕翠神清骨冷斷閒愁鐵石心腸轉娥媚

花前臥聽清商弄翩翩化作棲花鳳一聲清磬梵天
來月落參橫破幽夢

泛舟昆明湖登太華山大悲閣

爲愛秋清太華峰平湖一葉泛輕風萋萋碧草彌蘭
澤豔豔紅霞護梵宮勝國宗臣遺像在沐國公像
藏寺中溟

王戰艦劫塵空憑闌不盡蒼茫意極目斜陽數去鴻

庚戌橋

鄂文端
公建

陡絕兩崖削中臨千尺谿危橋飛鳥上落日暮天低
濕翠黏衣袂枯藤罨馬蹄當時豺虎穴直作往來蹊

飛雲巖

日日山行飽山色無限奇嵐惜不得徑來巖半踏飛
雲放眼更驚遐怪極洞口儼若雙扉開天宇中敞忘
崔嵬倚空重巖拔地起豁開深處安蓮臺金容孤映
靈龕碧鐘梵清音透巖隙香篆依依暗自縈乳竇垂
垂寒欲釋傍壁晶簾百道飛蒼松爲額雲爲衣天風
捲起環佩亂九霄咳唾霏珠璣斜橋曲徑轉幽邃屐
齒無聲印穠翠更欲窮探路轉迷定知異境眞靈祕
鬼劈神剗混沌前紅塵遠隔路三千終年默數雲來
去得作山僧便是仙

麻陽船口號

新月纖纖疾如梭
麻陽艇子九家多
並坐可能橫肱
否伸眉可奈打頭何

快櫓輕翻雪浪寒
崆峒怪石劒鋒攢
眞看瞥眼砑坑
過險絕黃獅滾洞灘

宛轉紅闌瞰碧谿
世人無計得仙梯
廬敖只在雲中

住那必桃源路易迷
辰州臨溪峭壁遺構宛然相傳爲仙人屋云

日出東南隅行

清陰彌繡陌
女桑枝葉繁
初陽下蘭薄
微行萃嬋娟
佳人絕世姿
明豔侔朝暄
首飾耀麗景
被服霏春烟
輕霞溢光彩
仙露挹華鮮
提籠澀細步
援柯齊高鬟

采采攘皓腕百態無藏嬌清川媚芳影惠風相留連
動容道旁客踟躕馬不前搖搖中心奪邈邈幽思牽
佳麗誰不愛況乃負豪賢良期要蹇修密意通殷拳
情傾忘所當義在安可愆如花妾顏美匪石妾心專
秀色難自掩禮防固所嫻何因枉君顧亦不爲君妍
人生有定分各自安其天願君垂清聽使妾微志宣

德安道中

穩臥籃輿內披裘怯曉風靜聞鈴語度清似佛龕同
春野鳥聲喜江城物色豐尋陽經幾度彈指五年中
驛古多藏怪空壇樹有神偶因尋舊跡相與撥芳茵

蒼鼠欄前竄垣衣壁上新匆匆排馬去誰爲拂頭塵
雙隻道傍堠無人管送迎溪橋連水闊巖樹與雲平
人語喧前渡炊烟起暮城匡山知更近先覺客懷清

臨淮關

淮水清如鏡沙平兩岸遙長橋橫古渡舊跡憶南朝
老樹雅聲靜豐年市語囂郵亭畱客住且止短鞭搖
渡潯陽江

暮靄澄匡廬影落江千尺江水浩無際渺渺連天白
夕陽挂遙波新月吐山隙歸船競喚渡沙岸亂行客
輕帆十幅張萬頃平如席臥看香鑪峯青翠落巾舄

遠懷醉吟翁曾此司馬謫不愛江山清苦厭蘆竹宅
一夕聞琵琶青衫淚痕積生平恬退念于此難自適
達人尚如茲俗士更何責惟餘詩筆清留照江波碧
和黃山谷集中情人怨

喚起遼西夢殘妝印枕紅含情窺鏡檻無語倚簾櫳
卻下玉階立殷勤祝塞鴻緘書何日到看取首如蓬
題五代史吳越世家後

大亂不數觀讀史駭心目前惟西晉衰後乃五代續
官家出羣盜將相半廝僕紛紛等兒戲變若舉棋速
英雄各乘勢割據裂輿軸岐梁晉蜀漢轍蹈安史覆

梁竟屋唐社晉亦傾梁族從此亂靡寧中原厭人肉
就中稱小康長江限南北吳越與淮南稍肯事井牧
淮南亦多事三姓更篡逐周宋復宿兵殘破生氣蹙
惟有武肅王保境甘雌伏眞王固自爲稱臣爲民辱
千里浙東西幸免罹鋒鏃賢孫識天命歸國膺朝祿
遺愛至今畱猶歌陌上曲歐公健史筆思繼素王躅
奈何所褒貶頗不滿衆欲昔聞春秋義善善從長錄
捍難如錢王獎許宜不足猶云虐民人求全毋乃酷
吾愛表忠碑幽光闡玉局

韓旭亭丈

是升

招飲藥洲次石上元人詩韻

過雨瀛天爽氣浮
偶陪杖履到仙洲
映衣青雪修筠潤
影水華星異石幽
花藥清含千載勝
池亭冷占一坊秋
酒闌素月流瑤席
槎客眞疑到斗牛

再次韻

石應星躔古色浮
千年勝蹟紀靈洲
霸圖已逐風雲散
別館空餘水木幽
澹蕩清遊饒我輩
聯翩佳句鬪新秋
玉堂珠殿今安在
底用淮山挽萬牛

自題所作畫

秋林疎處三家村
萬山奔赴環衡門
山中有泉不出山
山下有澗難尋源
世間未必有此境
勿以畫法相

排根仇池之穴有足不能到桃源洞口有手誰能捫
神仙心慳閉福地世人耳食傳空言吾欲挽底一一
巨靈闢直恐眞宰愁絕生煩冤不如落筆涉疑怪塵
寰仙界未可分放筆一笑清風生斜陽忽過蒼松根

孫平叔

爾準

招遊花塢遇雨

郭外閒遊小舫輕濃陰壓午變朝晴沙明鷗鷺疎如
畫秋入菰蒲寒有聲軼事誰搜偏霸史香阡畱與老
農耕坐中數子清譚劇我亦悠然無俗情

九日同黎二樵

簡

韓旭亭丈

是升

孫平叔

爾準

林明齋

浚

登粵秀山

涼風警幽律爽氣溢滄瀛雲物臨重九金行叶後庚
人聯吟履健天放好山晴瘞劒畱餘址憑闌鬱古情
炊煙浮萬井落日滿重城疊巘林間翠澄江檻外平
曠資延眺適興洽笑譚傾意氣吾儕勝風光此日清
蒼茫增遠思蕭瑟動秋聲向晚浮陰變漫空海霧橫
四垂迷一色半塔迴孤撐白鳥歸飛渺紅霞界畫明
下山頻住步歸路已聞更記取斯游樂重爲異日盟
平叔將歸二樵以秋林寫眞贈行并系以詩平
叔屬僕繼作以志友朋惓惓之意

詩人足秋骨氣與秋相親徘徊寒林間詩意彌空旻

所思不可見高眇誰爲鄰至音不孤響千里通精神
感此江南客來歎梅關春杯酒見邂逅恍然如故人
相視兩莫逆得意同一真篇章闢健疾無窮出清新
荒荒尉佗宮浩浩三江濱山川富雄勝畸士多絕倫
自我至此土斗柄六建寅早見樵夫詩會面未有因
騷壇得平叔喜足張吾軍展轉通縞紵職志推夫君
二子洵不偶才力各雄振光采舒白日五色同璘霏
相逢方恨晚相別詎忍言不聞昌黎語願作龍與雲
中心長無忘蹤跡難具論寥天有往翮大川無靜鱗
北風吹木葉黯然消離魂水雲自在水山雲終歸山

形骸苦間隔難伴征帆還樵夫行樂處木石相與閒
知音日已遠絕調爲誰彈秋林夜夜夢長在芙蓉灣
吳越雖云遼豈異咫尺間寫此無住相神采丹青全
侑以贈行詩肺附金石堅誦詩見君心披圖見君顏
顏色看逾好詩句誦屢歎不寧慰相思愈結相思緣
念我亦久客歸計遲明年家門近相望一水通洄潏
便訪海棠巢平叔詩齋名不待除頭塵傾倒及他日回首
憶今晨領雲同送目海氣黯不分樵夫念離別早作
江南民

贈別平叔

嗟余鮮兄弟四海渺友生落落性寡合意氣徒崢嶸
炎方豈少士有蓋無從傾鵠原悲宿莽喬木感春鶯
獨言誰爲聽獨唱誰爲賡君自江南來幕府謁上卿
詩詞炙衆口立譚蜚豪英過庭聞客至一見爲眼明
憶昨並少小大人官燕京與君先中丞壘簾敦交盟
君弱余兩載視予猶如兄別來不計日躔次已載更
豈料得邂逅話舊茫然驚余齒空加長子才卓然成
館子東軒下議論聽縱橫珠光走的皦璧理橫庚庚
于言快奔放彪外由中弮慚余胸僻陋瑣碎搜蟲蟲
列陣勉相抗對敵無此効交綏有迴舍端不聞鼓鉦

旁觀林與蔡壁上但盱眙既極文字娛嬉戲無不營
不異蝸髻時握手同游行園中富草木聯句題蕉枰
虛亭貯風月水石有餘清夜譚輒忘倦酒盡畱空鐙
講求及繪畫餘興到楸枰余久病寂寞得子揚眉衡
聚處雖云洽別念常紆縈北風吹面起千里寒江平
孤帆溯溟峽落葉催歸程畱子復何事送予傷我情
吾儕道義交離別固所輕胡爲效兒女泣涕沾衣纓
所惜子去後莫予相排擻羣疑塞胷腹開卷目空瞪
自惟質忸愁虛抱願力宏子才十倍我壯氣陵霄崢
風華未足恃學問貴專精五經衆說鄩如天覆八紘

學者各有得譬如斷柏檉大者成棟梁小者備椽桁
要當爲江河奔流歸滄瀛勿爲井與池僅供汲缶罍
文章雖小技以道爲之楨陶融去渣滓琢磨發光晶
鴻鐘萬石重鉅響殷華鯨甗笙雖百沸止作蒼蠅聲
願君歸鍵戶無使塵務嬰淵源家學在絕勝金千簫
蓄畬獲豐年穠蔭賴力耕著書卽示我不啻惠瓊瑩
羊城試回首西日千山頽懷人風雨夜讀詩廢雞鳴
神交在肺腑亦不在合并感子骨肉愛勗子千載名

次韻三樵送平叔後作

目送歸帆煙靄深僕夫催馬轉城陰風高落木搖離

思天闊空江蕩遠心此後雙園勞悵望遙知三峽嬾
登臨夢回贏得相思句指印依稀劃滿衾

次韻二樵懷平叔兼以示僕

梅花影覆領上關領南領北幽香寒香風逗夢送歸
榜嚴冬水淺上瀨難索居易覺時日闊離思爛漫如
沃雪殘燈炷盡掩卷坐薄帷風動入明月月光迴照
花村紅村翁與我同傷別別後詩篇見恨晚百遍摩
挲手生暖先愁撫鏡華緇鬢誰與賞心共青眼知君
作惡真不堪吟懷遠挂龍山尖春糧寄聲爲我宿莫
耽睡意南榮甜鵝谿素絹長委欄破愁要借煙雲酣

慎勿使我別意添東風吹漲大江淥便尋昨夢歸江南與君相見復有幾那得再言休細譚

二樵前有
休細談行

次韻二樵見懷索芙蓉花種兼寄平叔

江村花氣香一江褰衣欲涉寒無杠故人歸去渺天末誰與可惜娛此日花村夫子畫法近所無上視唐宋花同不荆關往往挽底出妙在神似非皮膚曷不來就我乎館爲我畫筆起疲軟折麻日夕苦懷人不念月窮星歲短與君相拒百里中不見亦與千里同君緣苦吟被花惱一棹快趁朝來風攜詩過我日未午空齋晝靜圍蒼榕芙蓉作色傲老翁燄燄吐豔牆

西東花村百花此花少徑欲移種呼花農杲杲寒日照顏色愛爾性耐霜天紅請君放筆爲巨幅高張對此蜀錦叢臥遊夢與江南通待君丹青設色終報君一束紅芙蓉

次韻二樵見懷

立盡征雲送遠眸炎方冬日始悲秋吟邊落葉依人住愁外寒江繞夢流浚谷風期勤攬帶握蘭心事寄登樓試容尊酒長相見問事應知未肯休

光孝寺貫休設色羅漢歌爲吳觀察賦

是日更觀張葯

房所藏水墨
二幀贗筆也

西嶽高僧禪月師能詩清逸畫更奇詩中兩字不爲
錢王移孤雲飄落西南陲金天夜夢光琉璃應眞環
侍修容儀圖以水墨眞相無參差歐陽翰林爲作詩
讚事本實辭不支僞禁藏弄寶若珣玕琪宮中供養
誰奉持前後花藥夫人窈窕姿垂祐竟莫邀佛慈縣
州軍破降表馳圖書輦載歸中畿宣龢譜中所載其
卽斯劫灰銷盡金明池內府之藏散若雲煙霏神物
化去疇能知更聞豫章西山亦師卓錫基手寫一十
六幅儼以已相同光輝雲臺之院荆榛園流傳眞蹟
在世日以微雁本雜羣忘呵譏珊瑚鐵網耳食漫詆

棋比若右軍隸書見者稀法像不作玩賞資錦暉玉
軸空延晞零縑仍向梵門歸訶林舊寺南海湄六祖
道場慧昇融祥曦何年一尊來皈依經坊傳寶不受
渤海欺盜池日影青窗篩照見壁間古色光陸離龍
天經過從游嬉優婆瞻禮誰敢踦花鬘雲護香馥馥
吳侯愛畫關天機衙齋畫靜翠竹含風漪法容欽佇
結願彌寺僧傳看雅又齋開樽坐客堂東宦摩抄一
三神爲怡古綃綻裂直恐從風吹丹青剝處生面猶
依稀光明五色蓮花衣尊者倨案低弓麋弟子旁奉
巾餅隨下有猿公竦竦舉首眎榆櫟貝葉千函披耽

思疾寫腕不疲三千法界澄摩尼癥痕久已付剝削
寫經非寫不涉文字疑安用皮紙骨筆爲自來畫師
亦夥頤僧繇道子邈莫追後來能事休公推手蹟慙
此片幅遺挂壁不與龍俱飛應有大力爲引維何況
當時應夢神筆揮定有微妙窮思惟不可更見有已
而紛紛摹倣寧非癡飽恣眼福寒更遲歸來月色橫
梁栢惜無金風亭長筆瑰琦才弱徒耐十日思神光
墨妙讚歎窮於詞千年迴望長嗟咨

送侯貞友秀才

雲松

還金陵兼寄平叔

去冬送孫郎積雨暗沙浦望眼凝寒雲相思逐檣櫓

今春風雨送侯生，勿勿歸舟艤江滸。
感今且復念前別，使我離愁燭腸肚。
金陵此去六千里，迢遞郵程畧可數。
自從南浦達三山，所過名勝居十五。
馬當險壓彭郎磯，迴抱奔流鬱吞吐。
小姑娘罷立明鏡，霧鬢風鬟相媚嫵。
山高祠古玉座幽，祕怪翕忽神靈府。
大江春漲壯風濤，南下輕帆疾于羽。
潮落瓜洲冷陣雲，月明牛渚開詩宇。
南朝舊跡最臺城，鍾阜岩巖蕘風氣。
古君行到及莫之春，冶豔家山開畫譜。
卽論客遊亦勝絕，何況歸作風月主。
孫郎乃在百里近，扁舟定見朋簪聚。
炎荒迴首話舊遊，應念鄙人索居苦。
題襟爲遣

鯉魚傳素書好待呼童剖

卽景學二樵體

春雨一春春事殘落花滿地東風闌濕雲低壓小院
黑白燕凍立紅闌干醅醕人意經時醉區霽鶯花幾
日看朝吟莫吟足春病江南江北總春寒

寄二樵

庭草如煙別日長臥聞啼鳩送春芳經旬風雨江天
遠裹飯誰能視子桑

朝雲盡日不歸山細雨和烟漬翠鬟滿徑落花須料
理遙知白晝揜虛關

大人祭南海神祠有詩敬次韻

日湧樽桑曙色明升禋海若肅精誠潮平島嶼空無
際春暖魚龍偃不驚大壑氣深靈怪集南維祀重禮
儀清行看赤穀登初熟風雨和甘慰衆情

木棉花歌

炎方木落三月天桃李已盡春不妍亭亭修幹絕翹
繚數枝挺立當門前夕陽欲落散餘暉燒空幻作十
丈蓮祝融行春駐綵仗虹旃蜺節相後先童童朱蓋
矗馬首葳蕤四匝紅雲圓東風散傳猩脣血鐵網拘
折珊瑚鞭陀羅八萬四千臂金色悉現兜羅縣迷樓

高敞十二曲絳裙搖曳疑神仙想當勾漏藥九轉石
牀砂暖丹生煙不然燭龍吐朗耀神珠散落扶桑顛
頽虬墮鱗訝燦爛赤鳳墜羽誰緝聯時平萬里靖烽
火照海直作犀株然蠻獍蜚女謝蠶織要術可補齊
民篇夜闌不須更秉燭滿池紅影驚鷗眠

寄平叔五首

羲輪無金柅奔軼不可遮羽音旋角律凍木發春芽
皇天分四時于春獨繁華行樂當及時何爲數咨嗟
豈無聲音娛延露及皇莠掩耳捨之去聊復免心多
窗前有嘉樹飛鳥鳴相誇徙倚蔭高柯獨立至日斜

春心目千里芳草天一涯離思浩難任長歌寄折麻
領南異江南春雨似秋雨秋雨送君悲春雨憶君苦
遠望感吾心鶯花空媚嫵晨風動高枝落葉掩窗戶
寥寥一室間晏坐自仰俯瑤琴拂輕塵虛弦爲誰撫
齋東半畝園頗亦類郊墅別來久不窺木棉紅如許
晴天片雲赤翠幄列炬舉韓豪旣已遠誰妙體物語
攜酒酌花下且復濯愁緒曩飲輒傾石今飲不盡黍
感物懷所思矯首獨延佇

閒夜景氣肅朗月開塵函徘徊中庭下花影香一衫
憶昨夜行遊攀躋登層巖瑤宮敞戶牖虛檻憑松杉

重城明積雪萬戶清光咸謂言此中人爾我殊酸鹹
剖懷出高論秉志神明監清歡付省記狂語今三緘
黎子在城南咫尺不數見孤詣與世違所至遭唾面
名心或未淨利途終不眩春傷千里心時悲過眼電
苦吟朝復暮冰雪自咀嚙惟有退之心日思貞曜薦

君子亭步月

人事晚來少虛亭獨夜過物情閒處悟詩味靜中多
露氣涼花影池光瀉月波凭闌忘久立漸漸轉星河
五月十二日薄莫睡起作寄二樵

急雨灑瓦散不收霏空雲集迷夜晝北窗夢逐雲車

同起濯清風熨面皺階前積水扶寸深弱花委葉依
階陰長天渺渺涵靜白咫尺根觸江湖心須臾明月
升東林清暉流照溢素襟連宵枯坐困埃鬱放意一
發快哉吟忽憶所思隔江渚舊雨良辰渺何許扁舟
倘泝新漲來趁此涼颼拂隆暑

柳枝詞贈歌者

春人弱帶自依依媚煞迴波不肯歸羌笛千枝吹夜
月柔情化作夢雲飛

瀉影流波去不迴汀蘅洲芷共徘徊題詩合問韓東
老別後情襟可得開

七夕分韻得閨字

莫氣清炎暑高旻淨點黥嵌雲星撒菽離海月分圭
昔雨車痕浣今宵鵲駕齊曼辭傳蜀肆仙偶記牛閨
天帝錢曾借河梁室尚睽報章終歲憶怨曲七襄題
永夕占應見遙躔望未迷盈盈鸞馭渡隱隱鳳蕤低
文憶羅池諷詩從樂府稽妝階耽繡侶巧製競宮娛
吉慶花初翦羅睺果共攜柔懷珠斗北香影玉闌西
鍼鼻冰絲貫蛛窠鈿合齋密思含欲訴私語怯還憊
竹露涼綃袂蘭風動綵視漏聲沈箭水夜色透簾犀
脈脈憐斜漢匆匆聽曙雞流輝催霧佩別意溢霞袿

豈有天人眷情同兒女締何時銀浦涸靈匹穩雙棲
寄懷韓旭亭丈

歲事忽已晚風前思渺然海陰彌極浦春色入殘年
花木禁寒淺江山得氣先陪遊空眷眷佇望莫雲天

題張亥白

問安

渡海圖卽送歸蜀

圖爲王
叔畦畫

張君昨從使者來恣探漲海搜儒材珠崖一髮裊寒
翠旌旗葉葉樓船開平生好奇此遊最蛟宮蜃市窮
疑猜卽今歸裝束倥傯未忘逸興凌瀛萊畫圖遣寫
海天碧彷彿浮槎八月客不知王君下筆時挽底波
濤幾千尺秋氛盡捲黃星明洪流湑漠如鏡清皇娥

倚瑟馬銜舞樽桑日湧天雞鳴溟滓一氣涵意匠風
雲萬里酣詩情袖中博得織女石歸時持問嚴君平
黃龕水落如綫鍼單舸穩沂夷江潯天南迴望試展
卷夢中溟渤蒼然深

泊蘆包去歲平叔泊此以書見寄

夜火蘆包戍孤舟一宿畱故人曾此地尺素慟離愁
天海星辰闊關河歲月道蒼茫生百感獨立俯寒流
乘月夜行晨至黃洞過峽山已三十里

七年八過清遠峽一度題詩凝碧灣寒月沈江明去
棹好風吹夢遶蒼山舊遊記坐談經石古洞誰尋白

玉環翠巘綠煙迴望合靈旗
蜚留二禹還

滇陽峽

南來險說滇陽峽亂石參差插竹萌
掌劈何年通地脈江流到此作灘聲
連峯隱蔽疑天小綫路縱橫讓虎行
太息樓船下楊僕武王空築萬人城

寄家信書後

亂雲低岫夕陽銜倒射江光到枕函
無賴櫓聲搖客夢有情山色戀征帆

山頂人聲山腳響水西月影水東生
岸上愁牽波上柁家中人繫客中情

卽景

急雨才收爽便添
水天澄鏡拓新簾
山腰雲氣連山頂
碧落風高露一尖

溼雲擁山隈
落日照山岳
雲日兩無心
山容自明滅

無題

瑤宮深處下來遲
雲母籠燈醉後窺
祇有神仙差可擬
卻嫌珠玉總無奇
山中花放三千歲
月處星生八萬姿
天上人間大歡喜
兩心如一定情時

曲曲闌干傍碧池
玉肩同凭斗斜時
愁沾露氣宵寒重
嬌到花光月影遲
爲指流潢握纖手
偶聞簫弄展

嬌睂柔魂銷盡無多子禁得蘭芬對面吹

消渴何須犬子耽羅襦未解已魂酣生來骨是鎖子
結過去身爲訶利南密院懸知居第一良期好訂近
初三縣縣此願連雲海懺悔除教大乘參

霧袂霞裾想見之獻珠贈佩果爲誰三生影事虛無

處絕代名姝邂逅時蠟燭燒殘九龍焰爐香裊盡八

蠶絲陳王自擬蘭臺賦金枕何緣有夢知

陳琳王粲
並有神女

賦蓋擬宋玉也獨子建洛
神以爲感甄流傳之妄耳

始興江口

月黑雨瀟瀟斜階水驛遙風來狂似虎灘響健于潮

酒戶撈愁闊詩才破悶驕翻因無俚甚未覺壯懷消

雲封寺張曲江祠

紆迴石級上曾顛曉日初開半面天一道清泉縈磎

曲萬峯穠翠撲睂前攀藤入寺瞻遺像積雪封巖記

往年

庚戌春大雪後過嶺

七度往來成熟客山靈爲我破寒煙

梅嶺

高峯邈邈合嶢嶼薤雲煙絡幕常羊維虧蔽東南天

海嶠扼要領吳粵分星躔中州清淑氣到此鬱蜿蜒

憤盈地脈孕作埶盛氣顛大山宮小山提挈同迴旋

高崧卑者嶢蜀獨嶧則連平原駿馬奔驪駟駟驪

重潮鉅魚湧鱧鮠鯢鯛鰕削若左蠹偃蠹如權火燂
其陽富材木發骭枝叢駢其陰遏白日亭午風咽咽
清泉數十道日夜流涓涓南匯滇江源北潘贛水淵
天心限峻危人力通荒埏驛埃里相望遽傳馳聯翩
我行隆冬殘宿霧披重絛蒙茸擁裘帽關驛乘筠簟
嵐凝松翠凍寒重日色薦始就崦嵫行漸乃岑巒穿
巖覆石角利礪戶流澌濺磴道千百盤盤盤上曾巔
兀兀挂角寺瑟縮棲枯禪肅肅曲江祠闔藹鋪神筵
遺像儼秉笏風度猶清妍從以張太守勝代華亭賢
摩娑讀殘碣惜無鉅製鐫自昔開鑿功至今行路傳

創始具大力工費累億千曳牛五丁走驅石雷公鞭
竅剖混沌散道兌榛莽舉用濟舟楫窮輶櫓隨所便
古人磊落曾明決無拘纏作事規遠大百禩光簡編
密塗一已啟行者無弛肩擔簦踵相躡負重脅屢骭
絲纊下三吳綾錦萃兩川航島來珠貝幕馬流金錢
茶鹽更鱗雜海物羅腥羶遂成大都會不復知窮邊
緬維漢宋初頗復竊據偏高櫟時陞制黃屋龍旗懸
瀾迤二禺峯宮館窈窕延呂嘉雖入海不免長纓牽
降王去作長五五空紀年胡爲此天險不克保境全
樛后旣賣國媚豬徒爭憐亡國由女戎覆轍如相緣

函谷百戰餘屢見丸泥堅劒閣一夫守勒石銘拳拳
茲山扼奧區不聞宿戈鋌中原六師至蕩蕩開樓船
山靈晏無事終古長酣眠況當升平隆形勝安足權
庾戌旣已荒蕭壘亦久捐土無當日鏃耕有古井田
青蔥藝犖确虎豹無伏跼行人縱溥覽落日千峯圓
曠懷溯絲邈慨焉賦斯篇

章江舟次

歲晚荒江泊庫篷枕水眠離情千嶂外旅思一鐙前
已盡澆腸酒誰輸軟腳錢夜深霜力峭風重浪聲圓
翻憶冬寒淺空傳春信先無村更漏杳不寐夢魂懸

棲屑艱行役崢嶸閱歲年紆懷抽繭緒結念問茅簷
漫道竿非瑟難將石作田相如遊已倦不問祖生鞭
晚至圓通寺坐夜話亭彈琴

看山信步遠曲折入寒林日落杉松暝雲起匡廬深
古寺畱前蹟鳴泉清道心呼童掃白石明月照彈琴
菜花

郊塍迤靡畫縱橫一望黃花爛漫盈野樹生煙疎更
碧平原落照淡逾明幾家茅屋斜臨水一桁春山曲
抱城莫似無端撩客夢放教高並玉階生

臨城道中

帽影鞭絲拂曉風
驟綱鈴語忒匆匆
綠楊村外沙如月
不露燈光些子紅

荒程草草一宵淹
無著閒愁到處添
篤速短衣焦已甚
也思熨帖少蕙尖

鑑止水齋集卷二

德清許宗彥

詩二

連城鎮

我行逾十日席帽滿征塵
少半郵程過年來獨客頻
小詩聊養氣短睡亦怡神
頗愛迎梅雨輕寒似早春
臨淮關渡淮

胎簪峯分桐柏支井泉湧
靈源奇甘讒鑄鼎鍊餘
鍊琅璫牢鎖無支祁三千
餘載川瀆改江淮旣台黃
淮匯下流勢蹙上流紆一
線雲梯爭入海我行四度
臨淮關演漾清波照客顏
十里浮橋平似席千家板

屋繞如環今年淫潦連春夏斗漲濤頭筏難駕尚畱
長菱截東西待權商船未許下佳馬行人喚渡船點
波雙槳載輕羈却愁雨密衣袂濕未妨浪蹴行膝濺
更憶淮陽舊戰地元北蕭南互雄視形勝蕭條故壘
剡箭鏃沉霾陳雲閣舊事茫茫誰復論紛紛得失等
浮塵惟有淮流長在眼寒潮鳴咽弔前人

楊柳枝詞

綠窗當面水盈盈弄影柔絲作意縈惱亂多情腸欲
斷柳枝直是太無情

趙北燕南二月時黃沙卷地亂風吹空堤落日牛羊

下裊殺柔條知不知

啼煙恨雨一絲絲江北江南惜別時目送淥波春水
遠愁睂不展鎖相思

闌干一桁裊春痕細雨斜風晝閉門少婦凝妝相對
立不曾離別也銷魂

本來楊柳無情樹也復新來學世情染出貴人衣上
綠不知甚事却干卿

無主情絲到處牽暗風輕颺落花天紅樓薄晚垂珠
箔紫陌何人挂玉鞭

誰裁楊柳滿天涯蒿惱三春總是伊直須帶葉連根

斫免使情人怨別離

標格終難同晚翠風姿猶足弄春妍請君莫倚東風
寵撩亂煙光儘放顛

北峽關

北峽真如峽巖疆古盛唐蛟騰橫潦溢村小亂山妨
屋角明新霽雲頭透夕陽牀牀苔蘚積難禁雨淋浪

舒王墩

荆公本經生績學參賈服坐非宰相才謀大用覆餗
拘儒多好辨惡直匪所獨明知議論乖未宜意氣伏
護前激成禍倒行不知復讜正旣斥遠讒巧逞詆詆

身名一朝隕朝野歸謗譏新經暨字說攻者矢集鏃
當時立學官閱代無留牘遺文縱旁見綴學恥勿讀
向使生不過安被傾邪目著作成一家定復垂簿錄
不見公後儒亦各逞胸腹六經意點竄隻手掩萬目
士患遭際艱公恨功名速榮辱隨飛灰是非無轉轂
王公號徒崇荆舒懲已蹙貽笑東山人一墩聽絲竹

司空山

青山不壞身凝寂自終古稽首司空巖安心證初祖

鞠歌行

山有桐蠶有絲音均清濁無參差鳳凰聲管象之雄

金上乃殘集卷二
三
鳴雌應不獨吹海山操陽春詞誰言世上無人知叩
牛角鬻羊皮不聞終身老卒廝不龜手三軍師人生
遇合會有時

四時詞

婪尾枝頭繭栗紅
選殘春夢尚朦朧
尋思裙帶無端
解試畫眉彎著意
工求友鶯聲忒尖咽
泥人花氣太
迷濛
簸錢鬪草都佯懶
白地傷懷對曉風

羅衣暫解畫簾垂
香汗微融午景遲
梯几戲翻金葉
格壁牋閒寫玉臺詩
剝開蓮子終身意
看到桃仁盡
日疑晚試蘭湯
嬌欲化遮渠明月滲冰肌

風動羅幃半面開，薄寒翠袖不禁搥。
短歌怕聽清商怨，長簫休吹阿濫堆。
幾縷嬌魂尋燕去，一丸冷月伴鴻來。
情腸宛轉都無著，紅葉隨流那得回。

犀帖重帷鎖麝鑾，衣篝宿火尚紅燉。
閒情捻雪香肌冰，小坐圍爐繡帙繙。
霜月凍迷簾外夢，梅雲清逗夜來魂。
劇憐擁背嬌眠熟，一種春回錦帳溫。

九江

我行最愛江州好，風景難忘試細論。
廬山雲氣純浸郭，湓浦潮聲直到門。
黃蘆苦竹助幽趣，細米大魚薦晚飧。
何事香山偏厭此，東都無過盛興幡。

五經廬山未得遊

與公當日賦天台寄想端憑圖象開五度客遊逢五
老古心古貌不容猜幾時直上香鑪頂下視尋陽水
一杯我自無情山有意放教雲氣逼衣來

望廬山

名山如佳人莊雅羞自薦容光若易近意態與人遠
秀中而樸外可敬不可玩斌媚出天然妝飾謝綵綯
斜陽故相惱纔許露半面雲綃護窈窕全身終未見
應有素心人相對共晨晏

自豫章舟行

江聲夜聽風聲報遲明舍策呼蘭櫂岩巖傑閣如相
招密雨沾濡阻登眺厭原翠色撲空來倒激江光入

酒杯簫史披衣還帶笠濃陰晝暗豫章臺

榆墩集簫峰在西山

高處諺云簫史披衣烏雀淋滴簫史帶笠鳳凰翅濕

八年八過灌嬰城篋裏詩

篇半紀程却憶今春自此渡三板輕船時薄暮中流
風浪忽掀天勢蹙龍沙迴鬱怒一壺豈惜償千金雙
櫓齊摧如裂布從來不尚匹夫勇忠信未能寧免恐
痛定迴思當痛時破冢真疑出破冢清詞一曲賽江
神八尺蒲帆重問津好倩長風吹送客人生夷險會
相因

滕王閣

當日昌黎到未能而今那復厭登臨
半空翠滴虛簷冷一角霞明斷岸深
畫裏樓臺環檻外鏡中帆櫓過牆陰
江山詞賦思千古倚遍闌干悵獨吟

劒池用陰鏗韻

何時雙劒座人代幾遷移寶氣忽衝斗
龍文終出池佩身生變化闕地畱漣漪
雄飛空復爾不如還守雌

卽景

舟輕風細上灘便拳局低篷枕手眠
落日忽聞啼鳥過前村知在茂林邊
波涵雲影峯斜矗沙引江流月

正圓疏雨晚來三四點晴霞如火挂遙天

峽江都督廟

周郎當日鎮巴邱古廟依然枕碧流月滿江天宜度曲靈風好共小喬游

豫章舊事戲咏

仙山渴鳳最無聊冤魄天牢鎖寂寥易耐雪霜難耐寡却來塵世伴文簫

射鶴巖前按步鞦韆雀屏消息竟全乖仙人應是憐無

匹轉妒人間好事諧

事見徐鉉
稽神錄

屬對天然才思多劇憐少寡似姮娥深宮一去添惆

帳牛背重教憶阿婆

清江范氏少寡嘗屬對云墨落杯中一片黑雲浮琥珀梳橫枕

上半輪殘月照玻璃爲楊東里所賞以薦入禁中爲女學師一日題老婦牧牛圖曰貴妃空死馬嵬坡出

塞昭君怨恨多爭似阿婆牛背穩笛中吹出太平歌宣廟見之曰彼不樂居此矣封夫人遣歸

白日昇天本渺茫先春結子太荒唐仙祠冷落巫雲

杳封股空憐定二娘

事見甘露園集

舟中

扁舟諧靜尚都忘行路艱晨几潤空靄夜窗奏潺湲

篷曲剛受月帆低乍見山沙洲晚獨立人如白鷺閒

夜行

暝色起何處蒼然暗太空舟行迷向背斗出辨西東

吉水

吉字分流處舟行日向西
深林太岑寂著个鷓鴣啼

泊花石潭

雨歇亂蛙鳴夢回江月生
半天雲尚暗高樹葉先明
裊裊檣檣影啾啾水鳥聲
愁聽舟子說新漲沒前坪

文山信國祠

信國勤王地山川姓氏尊
誓師聞感激分鎮竟空言
難挽興亡運終令節義敦
孤軍猶轉戰單騎屢跳奔
太息空坑潰曾無一旅屯
小名先繫宋殘局豈支元
柴市驚風卷蓑城謾語煩
韜鈴疑葛亮拘逼過劉琨

故客西臺哭丹心隔世存杜鵑啼碧血精衛化哀魂
祠廟遺民重滄桑往事論夜來章貢水嗚咽遶雲根

贛石歌

贛江峻悍贛石崛盤洶洶三百里內浩浩驚濤翻終
古澄不清日夜愁崩奔大黃公小黃公穹窿起伏氣
勢尊天柱破折陵壓崑侖銅盤趲趲電激霆震大湖
小湖雪浪闊大蓼小蓼霜風寒或如虎踞或人立駢
駢迤靡怪狀百出莫可分蚩妍匡坊高峙漂神蹲綿
津武索相鉤援來之坎坎陰陽連曉灘不知曉弦灘
絙如弦狗躑躅鼃蹯蹯魚梁窈窕金爛斑錫州白澗

接浩渺會神黯澹重波屯虎頭城郭望中見儲潭打

鼓聲淵淵二十四灘載陳史厥名一一良可詮

灘名見舊

志數止十八或數匡坊狗脚錫洲白澗或數金弦儲潭陰陽會神合之凡廿四灘

下灘易上

灘難大編萬石重衝飈飄若榆莢錢石罅逼側急溜

迸篙撐篙曳長年困紉多煩冤懸巖牽路重累上尻

高首據肩足駢四圍山東一握天長松拏攫虬龍蟠

藤蘿歟蔓絕壁纏波跳沫濺草木潤散作雲霧白晝

濛濛昏雷雨咫尺至不假龍公鞭鯨鯨沸鬱愁迴旋

但聞飛流澎湃相爭喧谷風蕭瑟腸斷啼哀猿想當

河圖開山闕未全大禹愛此峯壑好不使神靈鑄水

流順下本其性天工何意設險艱吾觀南安地勢高
高如瓴建下視廬陵釜底懸若無巨石百萬宛轉亘
其間奔流駛絕一夜成桑田不見漕河自淞達津衛
澶湣千里無驚湍每當春冬水落畏河涸五里一壩
十里一閘開閉動輒白大官客舟往往旬月延柁樓
女子無事歌聲圓較量誠不如此便上瀨下瀨無拘
牽戈船兩頭月彎彎灘師舉動合自然一日數灘過
三日吉至虔儲山廟古霏香烟神雅導客飛翩翩殺
雞灑血歌舞灘神前

由萬安至虔山徑僻狹宋建炎中隆祐太后爲

金兵所迫自萬安舍舟登陸趨顓太后及潘
貴妃等皆以農夫肩輿而行卽此道也

北來鼙鼓迫倉皇曾此宮興間道藏怪底山花能窈
窕定緣學得內人妝

梅嶺道中

峭壁高空削通人仄徑纔小亭依岌嶮孤寺戴崔嵬
直上駢肩踵高標割斗魁陰崖飛瀑雨深澗響晴雷
廢塞秦橫浦重關漢大梅雲垂黃木海嵐接鬱孤臺
終古山川壯頻經歲月催巖花名可數野鳥熟無猜
臘雪衝寒去炎風觸暑回山靈應知我定不笑凡才

詠懷

中天際泰運緯曜宣重光時和萬物奮理洽百務康
淵波少涸鱗沃壤無枯桑九衢平如水冠蓋行相望
青雲各自致白屋寧畱良讀史笑方朔滑稽同優倡
誰謂揚子雲乃羞執戟郎客難旣憤辱解嘲徒激昂
躁進良可恥距躍庸何傷

單柯植春林弱實依密蔭清芬貽弦誦結髮事丹槩
義方幸早承構腹凜勿任蘭暉永昕照小草舒薄豔
學海浩波瀾密爾勉涵浸不因溫飽安敢忘身名忝
粲粲咏白華磨錯結深念

薄遊至都邑逐隊窺儒門識字自有數事會難具論
失得且勿惜名實知誰真客嗟行役久悠悠過三春
陵茗秀朱實夏雲彌炎氛迢遙天南垂羞膳曠夕昕
山川間何濶敢辭僕馬勤領行陟猗靡水宿泛齋潏
遄歸悵行邁載見圓蟾輪上堂拜家慶愛景舒芳辰
抱璞敢自炫守身戒庶遵靜言息紛擾發篋誦遺文
好學亦爲福蠲沒副所聞

日體視大地大且百倍多東西九萬里來去如騰梭
夸父有棄杖魯陽無迴戈達人付曠觀任運得逶迤
志士多苦心撫時恐蹉跎視蔭樂休息固知少譴訶

浮生沒則已匹若海上波盛名貴可久自立非由他
我懷竟安託渺若凌江河壯年尚足恃莫待雙鬢皤
士生千載下聞見日以滋道古苟無識多識亦奚爲
八儒聖教散九師易道離譌言與脞說於義更無裨
頗怪博雅士攬撫期無遺紛紜列同異連犴淆妍蚩
成書每充棟母乃鈔胥疑何爲任耳目轉欲廢心思
浮文定妨要完小大必虧詳說反之約古義其如斯
至靜蘊生初哀樂因物移有懷誰能已發言乃爲詩
比興或殊趣風雅寧異辭要於情有感各自義所施
寄託邈爾遠文采斐然宜端憑寸心寫足使萬象隨

真意苟滅沒巧語終支離嚴妝盛粉黛容光固無奇
良工矜琬琢大樸無還期頽波孰能挽椎輪尚可思
聲音本自然悟者自得之寧爲後人棄勿使前民嗤
七年客滇徼八載畱領南領南介大海滇徼多奇嵐
趨庭富餘日攬勝意所耽碧雞山窈窕金馬巖趨輝
黃灣觀浴日萬里紅霞酣盪胸天地闊縱目今古涵
平生數遊跡寧止禹穴探東泰與北恒雲氣懷袖含
衡陽八九峯面目夙所諳四瀆涉已再五嶽至者三
會當尋雲將相與磅礴譚

悠悠七衡運萬象陶洪鈞人生宙合間大千一微塵

誰言細已甚妙合二五眞雖隨氣化轉自結聚散因
象從有爲設道以無名尊葆茲性命元慎勿離其根
剛中實坎戶柔正虛離門嬰寧守至要埃壻消中宸
一室生天光默遇太古春

觀音岩

峭壁莊嚴相金龕自在嵌山靈工布施石腹剖巉巖
物觀澄江靜天音韶石銜大千曾幻影何有此空壘
英德驟雨

暑盛魚龍沸平空掣電光濃雲遮日急弱樹捕風忙
跳玉波旋碎披襟氣轉涼蜚娘能狎浪倚舵尚新妝

珠江曲

娟鬟風細柁樓前暗送花香到酒邊自有海珠光
賽月放教夜夜照人圓

平頭艇子鎮相尋春月秋花往事深乞與珠江作圓
鏡照儂顏色照郎心

題韓旭亭丈行看子

粵秀登高詩滿袖驚潭送別月盈川酒人散後長相
憶幾度支頤望海天

梅花領上春冥冥歸路舊圖應再經

丈前有只恐吳

山妒吟杖杖頭雲氣海峯青

夜坐

萬籟亦已寂耽涼坐北榮
氣清微露潤天迴大星明
老樹靜如睡暗蟲時獨鳴
火中知暑退秋思一宵生
三水

八年三水道來往太踈踈
白髮關情切清輝遠憶頻
江湖原滿地風雨況侵旬
自在津頭住輸他打鼓人
中宿峽用少陵集鐵堂峽韻

連峰蔽空來勢阻江路絕
非阻非崔巍太古立積鐵
翠重陰崖肥雲頽陽岫裂
細溜停空凹皎若化殘雪
河伯此下材過客色無悅
峭帆掠懸巖屢作之字折

飛雨忽灑人曦景互明滅天風颯以寒盡蠲肝肺熱
重游峽山寺自飛泉亭至石樓峰望古飛來不
及上寺僧索詩用東坡次高要令劉湜峽山

寺見寄詩韻

峽山四垂合潁江一綫束禪關占奇秀幽討丐清福
亭午灑飛雨雲意不待族竹樹搖蒼崖櫺爽團萬綠
衲子迎客笑尚憶面目熟山門圯堦餘經殿徙帶玉
舟行瑟縮久脚力正飽蓄勇往蹋巉巖窈窕入澗谷
路斷得小橋幽亭依佛屋瀑泉落天風千尺曳霧縠
白鳥破空來窺影不敢浴翛然披塵襟曠焉滌憤辱

畫幅展眞境舊稿藉董督頗疑秋景深何有暑氣酷
枕流漱石兼不待清冷掬扶畱絡峭壁力欲穿厂腹
雖無寸土培未覺生意促橋邊連理榕交枝輻持轂
豈有多情魂空山化芳躅秦隱石壁鐫最高試游目
最高峯石壁鐫秦時有五百人避難于此十字眷言採金芝舉身跨飛肉才
到石樓峯欲進步蹙縮窮揆固未能十劣得五六所
惜過眼忘輒思握管錄他時許久畱清坐一龕足恰
恩香積廚歸舟颺檣燭

帶玉堂

本客堂今以奉佛

師座耽幽閒經堂謝來客山環萬龕青秋凝一灣碧

山僧晚畏虎梵放鍵櫺格何不檄山靈驅使遠屏跡

達摩石

石上鐫黃文裕詩

至人順遷化頑石戀久畱何年好事者鐫題石上頭
歲月閱江浪缺畫斷銀鉤楊碑沒苔蘚舊蹟邈難搜

天曆二年楊觀碑已不可讀

釣魚臺

孤石隱蒙密俯瞰千尺谿地無羊裘翁肝跡誰所遺
江光清瀉笠山影晴罨絲慎勿掣金鎖水府驚潛犀

飛泉亭

幽巖豁豁砢風磴矗危石瑟筑奏叢翠珮環戛寒碧

方知樂出虛地空萬籟迫響習一禹靈簫韶譜清夕
大廟峽用少陵寒峽韻

昨暮泊中宿秋氣感百端晨入大廟峽四崖障風寒
日烈草木瘦路細行人單魚龍逼沸鬱咫尺吹濤翻
奮棹就沙嘴怖止未敢餐此生長行路畏說行路難
湏陽峽用少陵青陽峽韻

綿延太尉山十峯九不惡切漢高龍從摩天翠崔錯
森如佛座嚴靈胡不敢削白猿渺孤騰清泉忽雙落
屏張九疊深江轉一帆弱日色覆虛陰烟光斂空漠
曾巖人逕窮冥寄傲五岳團團蛟龍宮鬱鬱氣旁薄

大造矜神奇太始隱寥廓俯仰惟生平生理耽寂寞

望夫岡

突兀江心峯遠蹠不記何年化香魄凌波瘦影立亭
亭窺鏡顰睂愁脈脈滇江水去有時回只有征人待
不來音稀候雁青門迴夢斷邊風紫塞哀青門紫塞
迢迢隔石闕長銜恨難釋熒熒冷燄閃孤紅漠漠土
花凝淺碧此心久已井無瀾此身甘與石同頑眼穿
落日征帆盡目送浮雲獨鳥還霧鬢烟鬟晚愁絕子
規聲聲山竹裂月因有恨倍淒涼水本無情尚鳴咽
蕭槭秋林秋氣寒極天關塞路漫漫誰能無事輕離

別倦倚孤篷亦嬾看

晚泊

亂山容易夕陽沈天入空江澹夕陰輕
簷掠波翻白燕明霞倒影插金簪荒村
遠岸孤烟迴古戍寒汀敗葦深去棹來
帆都小泊也如棲鳥共投林

保昌候館

黎辟灘聲雜晚風太平橋外雨冥濛鳥
隄引子浴深澗白鶴將妃啄水藻遠別
心情秋更惜畔愁詩格近能工明朝又
過梅花領回首禪山少去鴻

蘭谿

迢遞蘭谿水舟行灣復灣寒波清漏石老樹密藏山
落日飛鴻外孤城暮靄間鷓鴣閒曬翅輕逐釣師還

春江第一樓

危欄樹杪插疎寮瘦石巖均接麗譙第一樓憑富春
郭初三月上廣陵潮烟光橫野嵐痕薄雲影涵秋水
勢遙便著羽衣吹鐵篴飛來雙鶴不須招

六和塔觀潮

白龍夭矯穿空來大聲殷地轟春雷海門遙望僅一
綫須臾便向江心堆沄沄江水偃如臥憑陵恣壓濤
頭大快馬騰驤急鼓撾後潮飛逐前潮過橫驅風雨

戰高秋神鬼蒼茫動暮愁簸盪心虞坤軸弱呼洶目
眩天關浮迴湍激射蒼崖奔泥沙一卷旋波渾穿溪
注澗迅勁矢百谷一氣相吐吞宏艫大舩高駮駸重
碇牽連平不頗瞥如悴葉遇驚飈翩然再起還再墮
吳山遮迤黯遙青浪花批擊愁不勝便教直下嚴陵
瀨抗憤應知未肯平悸魂惺惺佇立久忽展斜陽莽
回首倚天塔影卓中流一雁飛來人散後拊膺慷慨
亦何有窮覽極觀真不偶激烈孤忠伍相魂淋漓豪
翰枚生手拓開萬古之心胸請向江天酹尊酒

韶石

小春天氣早梅生一棹雙江緩緩行
瀧水自清連水濁朝霞有雨暮霞晴
山留大夫賈游跡城是武王佗
築成虞帝節韶曾此奏風吹籠竹譜遺聲

飛來寺

秦人五百隱崔巍鑿險天教福地開
猿帶一環曾逸去寺留半角不飛來

保昌有挂角寺

竹生多應雌雄管神語

誰參動靜胎夕照荒祠最蕭瑟空山帝子幾時回

得梁處素

履繩

赴哭之以詩

悵悵深秋會匆匆別棹遄吟齋安竹里客艇返香田
急景催時換勞懷望遠牽報書方歲杪惡耗忽春先

詎意睽三月遂成隔九泉開函心惘若反袂淚潸然
生理誠難測形骸太不堅音塵猶髣髴事業尚屯邐
海內清門選平生學力專才思羣雅揜精向六經研
官舍趨黔曲遊蹤眺岱巔王能頌魯殿阮不寫南箋
汲古希耆碩鉤沈慕昔賢慨維麟策義實賴素臣宣
元凱畱遺癖東山補逸詮近來推顧惠古訓繼容虔
剔抉誠勤矣揅爬尚闕焉菁華曾未竭瑕礫竟誰鐫
東閣陳言積調人綴學沿權衡虛有待考讞勇能肩
寒暑功寧問諏諮意最拳異聞咸綴緝瑣義必關穿
信抱千秋志方期上壽延魂悲梁月黯夢促井桑顛

太息傷馳晷蒼茫感逝川撫今增敞怳憶昨共流連
誼託潘楊末情追范尹前浮名相絆勒隨分逐鞍韉
席帽晴披綠春衣暖去綿黃壚燕市酒翠柳玉河鞭
物論譽崔遠公卿說項遷介持貞士節儉守魏風篇
圭璧真堪薦蕭蘭偶被牽蠅還隨驥困虵漫受夔憐
瑩澈錢湖水霏微鳳嶺煙觀濤來遠嶠問故接長筵
坐久簾陰仄辭多燭暈圓忘年深繾綣歛愛洽周旋
每羨神機朗宜由德養全龍蛇逢厄歲昂畢直凶躔
形病應非害標治或可痊方難收上藥劫乃邁中年
壤質俄乘化神山或畧仙僚幽悲響寂光後庶名懸

令子承先緒遺書定早編關河愁緬邈性命悟虛元
東冀無從致哀詞詎足傳淒涼懷舊意灑淚對江天
子午蓮
瘦蔓縈盈碧玉盤瓣分秋菊小團圓六時鐘轉清香
發恰似圖澄鉢裏看

答內

遠離且莫悲遠歸亦勿喜暫離復見偶然爾世事紛
紛那免此勸君勿墮迷雲裏不見天關與織女隔以
銀河一萬八千里脈脈相看不得語

寄外

梁德繩

商風落木秋蕭瑟庭橘團霜綻金實屏山徙倚夕
陽斜目送浮雲氣紆鬱君子于役路悠悠女子善
懷心惓惓五年三度傷離別一度柔腸一斷絕纔
當夏盡喜君來那料秋初君又出君期歲暮當復
還無奈征行太匆卒梅關西去接章江岵嶠吳山
青入越如梭小艇泛齋淪如葉輕裝度嶺峯滕王
閣外落霞飛錢塘江上重潮汨壯游足以散幽滯
遠攬山川富奇崛蚶蛤毫管禿千枝豪情恣向詩
篇泄迢迢江漢限無梁思欲從君寧有術蘭閨終
日但凝愁憂從中來不可掇悄然淚下沾衣裳出

戶徘徊仍入室庭空寂寂晝陰深窗虛肅肅清飈
拂荷衣已褪菊屏殘海棠半萎蕉心折苔階敗葉
掃還生似我迴腸寬更結香兔煙微夜長極簾櫳
涼影篩秋月銅鋪露氣冷于冰玉砌天光明似雪
盤桓不寐到更殘漸漸星河淡將沒無邊景氣爲
誰佳得句仍忘嬾拈筆人生不有遠離悲焉知聚
處足歡悅行人今夕宿何方天寒苟得無飢渴想
見亭亭太瘦生苦吟百計搜心血畏風畏水閉筠
篷篷外灘高浪突兀戍鼓漁榔厲響清風鴉蘆雁
悲聲咽回望雲山千萬重客懷那不增慄屑縱教

內典豁塵根安心未必能如佛料應革帶日移孔
卯酒壯頰清見骨寄書不敢道相思苦勸加餐并
慎疾殘燈勿戀看書久半臂勤添禦寒烈萬事加
心身在遠僮僕無能徒蹇呐高堂頻自說行人雁
信不來垂憶切強寬時日數征程惆悵私心轉恍
惚小兒豈止不解事跳盪終朝儘頑黠侍姬正復
可憐人似慧如癡復如譎偏將瑣語溷遙思亂折
秋花供簪櫛明知少別非爲苦也識歸期近可必
宛轉牽愁不自知春蠶繭縛蘭膏爇仰看衆鳥定
雙翔俯眄庭枝不單茁嗟我與君同一身一身形

影如何別尋常相隔尚相憶豈況三秋千里闊長
路無情漫浩浩芳時不覺去忽忽安能奮翅起高
飛到處相隨勿相失

鼻烟

論蠟攜來市舶海雲養就蠻烟聞道略如採茗分別

雨前火前

鼻烟乃樹葉所爲以先採者爲上貿易以蠟計一蠟約斤許

疎快勝鍼風府不嫌假道靈堅水玉玲瓏滿貯提壺
勸遍尊前

久旱望雨

熙陽已作炎曦畏啟閉徒煩董相遵五日不堪連十

甘首春忽已到三春
老人龍舞逢壬癸
水氣星占直卯辰
喜見天牛緣敗壁
定知黑蜥躍神津

室後棟樹大可合抱
五月初六方晚飯
雷震樹折壓旁舍壞

亭亭棟樹百年物
僵立空腔生意絕
風來時向後戶拜
往往樛枝砉然折
自從五月來淫雨
未曾歇雷聲眩眩
暮未已鼠尾龍風
助超越居士逢齋
期鮭菜乍羅列忽
聞礚礚震旁近拉
攏崩頽勢颺撇茫
然匕箸墮手中掩
耳無由真太疾大
似將軍對寇兵不
知口處空流歎須
臾起視旁舍空四
壁天光露軒豁敗
柯

餘力破窗楹老幹撐簷橫突兀根株已作爨火焦肌
理渾如斧齊截未必蛟龍此屈蟠將毋虺毒潛成窟
孤生已分隨枯槁一震何因遭倉卒圖書爛漫尚堆
案雨漬泥污增悵鬱平生所著類平冗發屋寧堪六
丁掣君不見夏侯太初作書倚柱立雷火焚衣仍下
筆又不見薛孤延躍馬與雷鬪燎盡鬚眉猶喝殺儒
生疲茶自誇勇賸有談天口能說吾聞雷應大壯始
辟陰消害開萌茁四遊升降三萬里陽氣上騰隨地
出昨者西士爲余言知雷起處良有術琉璃製器仿
渾圓內筦黃金分竅節譬諸經絡互鉤連六六環生

成氣穴火珠圓轉當地心瞬息無停不容過偶然相
觸氣潛通一洩鍼芒來悅歎烈火平飛百尺高奔走
豐隆馳列缺我思此理近自然立法精微非詭譎仿
佛陽嘉地勤儀其用雖殊理則一乃知造物本無心
豈有危機時密發雷君裝束幾人見謝仙鐵筆誰爲
設萬物無逃錯綜數一物榮枯有始卒破除俗見釋
驚疑爨燭呼童理殘帙

夏閨

日長倦繡紫荷囊花氣薰人嬾出房斜倚荷蘭氈睡
去鬢邊壓損小南強

雨中摘荔枝

五月側生熟離離火實垂向陽紅更早帶雨摘尤宜
雲漢攢星影神人瑩雪肌晶盤堆最好飽啖頗嫌癡
光孝寺雜咏四首

風旛臺

旛因無定力故爾受風吹見性亦無靜而爲動者誰
不容參二相終恐落偏知願取楞嚴義重爲問祖師
洗盃池

大師持應器曾此濯清波湛定光常滿柔甘味若何

水八功德
五柔六甘

魚驚人影散鳥帶夕陽過坐愛香微妙風

吹鉢特摩

藏經閣

躡足初桄上千函榆櫺青閣空惟佛臥簷迴有雲停
大乘無生忍諸天請問經誰能演初義不惜日來聽

菩提樹

何年闍維鳥糞子落訶林龍雨護寒碧天風奏梵音
繙經拾殘葉敷具戀清陰正覺成慈氏翛然悟道心

晚步東園懷平叔

散策步園中夕陽在高樹歸鳥懷好音停雲蘊真趣
娟娟修竹淨靄靄幽花暮翳翳暝色浮湛湛水光露

金華山志卷之二
卽物寄佳賞追懷動遐慕同心眷彼美攜手嘉曩遇
機清理無滯迹妙神常裕離居亦何遠徂歲忽已屢
良風天未來何用慰情慆